

Գունավոր ուղեղիկի առեղծվածը

Գրքի հեղինակ՝
Երևանի «Վարդանանց ասպետներ»
հ. 106 հիմնական դպրոցի
2րդ դասարանի աշակերտուհի
Սառա Աբազարյան



Երևան-2025



*Այս գիրքը նվիրում եմ իմ բոլոր
հարազատներին*

Լինում է չի լինում, մի շատ
սովորական քաղաք, շատ սովորական
անունով՝ Ուղեղստան: Ուղեղստանում
բնակվում էին շատ սովորական,
մոխրագույն, տխուր, սահմանափակ
մտածելակերպով ուղեղներ: Նրանք ոչ
մի հետաքրքրություն չունեին բացի

իրենց առօրյա գործերից և նրանից,
ինչն արդեն նրանց հայտնի էր: Նրանք
ընտելացել էին սովորականին և հրա-
ժարվում էին հավատալ գունավոր
ուղեղիկի առեղծվածին: Դա նրանց
երկրում արգելված թեմա էր և մեծա-
մասնության կողմից հիմարություն էր
համարվում: Նրանք ուղղակի վստահ
էին, որ գունավոր ուղեղներ չեն լինում:
Չի կարող այդպիսի բան լինել ու՝ վերջ:
Նրանք իրենց փոքրիկներին անգամ
արգելում էին մտածել դրա մասին:
Նրանք հավատում էին սովորականին
և ընդունվածին: Իսկ եթե փոքրերից
մեկը դպրոցում կամ մանկապար-

տեղում կամ ուղղակի իր շրջապատում մի անսովոր բան էր ասում, որը կարող էր գունավոր ուղեղիկի նշան հանդիսանալ, նրան բոլորը ծաղրում էին, և փոքրիկը ստիպված իր մոխրագույն էությանը համակերպվում էր: Սակայն այս մեծ ուղեղները պատկերացում անգամ չունեին, որ հենց ամենասովորական բաներից են ծնվում ամենաանսովոր ու գեղեցիկ բաները: Մի գեղեցիկ օր Ուլեղստանում՝ Պարոն և Տիկին Ուլեղների ընտանիքում, մի յուրահատուկ փոքրիկ է ծնվում: Շատ խորը ու հետաքրքրաշարժ հայացքով և պրպտուն աչուկներով: Փոքրուց նա

իր հասակակիցներից տարբերվում էր ավելին իմանալու, չվախենալու, նորը բացահայտելու, գծված սահմանները վերացնելու կարողությամբ: Փոքրիկ ուղեղիկը միշտ ձգտում էր բացահայտել այն աշխարհը, որը հաստատ ավելի գեղեցիկ էր ու գոյություն ուներ Ուղեղստանի բնակիչների պատկերացումներից դուրս: Նրան երբեք չէր ձգում սովորականը: Մի օր իր հայրիկի գրադարանում փոքրիկ ուղեղիկը հանկարծ մի հետաքրքիր գիրք գտավ՝ «Գունավոր ուղեղիկի առեղծվածը» վերնագրով: Նստեց հայրիկի հարմարավետ բազկաթոռին ու սկսեց թերթել

փոշոտված գիրքը: Գրքում գրված էր, որ ինչ-որ ժամանակ առաջ իրենց երկրում ապրել են գունավոր ուղեղները: Նրանք եղել են աշխարհի ամենաուրախ, խելացի և անսովորը սիրող ուղեղները: Սակայն ինչ-ինչ պատճառներով անհետացել են, իսկ նրանց հետնորդները վերածվել են մոխրագույն, սովորականով բավարարվող ցեղի: Գիրքը կարդալուց հետո, ուղեղիկի սրտիկը սկսեց արագ բաբախել և նրա ներքին ձայնը հուշեց նրան, որ պետք է մեկնի ճանապարհորդության, որպեսզի բացահայ-

տի, թե ուր են կորել այդ գունավոր
ուղեղները:

Գիշերը, երբ ողջ քաղաքը քնած
էր, ուղեղիկը դուրս է սողոսկում
տանից և փախչում: Նա գիտեր, որ եթե
հայտնաբերեր իր ներսի գունավոր
ուղեղիկին, ապա իր երկիրն ու երկրի
բնակիչները վերջապես կվերափո-
խվեին: Երկար քայլելուց հետո նա
հասավ քաղաքի ծայրին, որտեղից
սկսվում էր սաղարթախիտ, անծայրա-
ծիր անտառը: Այն շատ խորհրդավոր
էր և ոչ մի ուղեղ դեռ այնտեղ ոտք չէր
դրել: Փոքրիկ, քաջ ուղեղիկը առաջինն

էր լինելու իր ցեղից, որ ոտք էր դնելու
այդ խորհրդավոր անտառ, որի մասին
հետաքրքիր լեգենդներ էին պատվում:
Ասում էին մեկ անգամ այնտեղ մտնողը
էլ նույնը չի լինում: Գեղեցիկ աստղա-
զարդ գիշեր էր: Ուղեղիկն ուղղակի
վստահ էր, որ առաջին իսկ պահից
անտառում ինչ-որ հետաքրքիր բան է
կատարվելու: Ու շուտով, շատ շուտով
նա կկարողանա դեն նետել այդքան
գարշելի մոխրագույն հագուստն ու
վերջապես կկարողանա ապացուցել
իր հարազատներին և Ուղեղստանի
բնակիչներին, որ գունավոր ուղեղներ
լինում են: Վստահ քայլերով ուղեղիկը

շարժվում էր առաջ: Նրա փոքրիկ սրտիկն ուրախությունից թրթռում էր: Նա վայելում էր անտառն իր ողջ հմայքով: Նրա ականջին էին հասնում հիասքանչ թռչունների դայլալը, քամու անհասկանալի, բայց միևնույն ժամանակ հիասքանչ երգը: Երբ մի ականթարթ հայացքը նետեց իր մոխրագույն հագուստին, նկատեց, որ ինչ որ անհասկանալի պուտիկներ են հայտնվել դրա վրա: Երբ ավելի մոտիկից նայեց տեսավ, որ դրանք գունավոր էին: Անկեղծ չհասկացավ, թե դրանք որտեղից հայտնվեցին: Բայց ավելի

համոզվեց, որ մոտ է գունավոր ուղե-
ղիկի առեղծվածը բացահայտելուն:

Շուտով նա հասավ մի բացատի:
Բացատում քար լռություն էր տիրում,
բայց միևնույն ժամանակ ինչ-որ
տարօրինակ խորհրդավորություն
կար: Շատ էր հոգնել ուղեղիկը: Նստեց
մոտակա քարին, որ մի քիչ հանգստա-
նա: Հանկարծ թփերի ետևից մի
ճություն լսեց: Շրջվեց և գուշակեք, թե
ինչ տեսավ: Զարմանքից բերանը բաց
մնաց: Թփերի ետևից նրան էր նայում
մի ծեր, իմաստուն հայացքով ուղեղ:
Նրա ողջ հագուստը խայտաբղետ

գույներով էր պատված: Նրանից մի անբնական փայլ էր առկայծում, որը վարակիչ էր: Նա մոտեցավ փոքրիկ ուղեղիկին և ասաց.

- Բարև փոքրիկ: Ի՞նչ ես կորցրել անտառում:

- Բարև խայտաբղետ, լուսավոր և գունավոր իմաստուն ծերուկ, - հիացմունքը չկարողացավ զսպել ուղեղիկը:
- Ես ուղեղիկն եմ և անտառ եմ եկել գունավոր ուղեղի առեղծվածը բացահայտելու:

- Հետաքրքիր է: Գիտե՞ս, քչերն են քեզ նման քաջ: Քչերն են, որ չեն

վախենում բացահայտել այդ գաղտնիքը: Քչերն են, որ երբևէ կարող են դուրս գալ իրենց ընդունված կաղապարներից ու ձգտել հասնել անիրականին, անսովորին: Դե ինչ, արի՛ իմ ետևից:

Ծերուկը փոքրիկ ուղեղիկին տարավ մի հիասքանչ ուռենու մոտ, որը կարծես անտառի թագուհին լիներ: Նրա վարսերը ոսկեզօծ էին ու հասնում էին մինչև գետին:

- Մտի՛ր, - ասաց Ծերունին: Այնտեղ քեզ է սպասում մի կախարդական աշխարհ, որը կօգնի քեզ

բացահայտել գունավոր ուղեղիկի
առեղծվածը:

Առանց վարանելու փոքրիկ ուղե-
ղը ներս մտավ: Առաջին հայացքից դա
հասարակ ուռենի էր թվում: Դե, միակ
տարօրինակույթունը նրա ոսկեզօծ
վարսերն էին: Բայց երբ ուղեղիկը
հայտնվեց ներսում նրա առջև մի
զարմանահրաշ աշխարհ բացվեց: Ինչ-
որ տեղից մի քնքուշ ձայն ասաց.

- Բարև փոքրիկ: Ես գիտեմ դու
ինչ ես փնտրում: Ուզում եմ ասել, որ
փնտրողը միշտ գտնում է: Դու հիմա
գտնվում ես մի վայրում, որտեղ ամեն

նոր բան, ամեն նոր երևույթ,
զգացողություն, միտք, երազանք
օգնում է ուղեղն էլ ավելի գունավորել:
Նայի՜ր աջ: Այստեղ տառերն են:
Դրանք բազմազան ու զարմանահրաշ
են: Դրանք օգնում են, որպեսզի
կարողանանք խոսել, գրել և կարդալ:
Իսկ երբ կարողանում են կարդալ և
գրել, կարողանում են բացահայտել
գրքերի կախարդական աշխարհը, որը
քեզ օգնում է գունավորել քո մոխ-
րագույն ուղեղիկը ինչ գույնով, որ
ուզես: Քեզանից ծախ՝ թվերն են: Սա էլ
մեկ ուրիշ զարմանահրաշ մոլորակ է,
որն օգնում է քեզ բազմաթիվ

հաշվարկներ անել: Մինչև անգամ տիեզերք հասնել: Եվ եթե նրանց հետ էլ ընկերանաս, ապա նրանք կօգնեն, որ էլ ավելի խելացի լինես և էլ ավելի գունավոր: Վերևում նոտաներն են, նրանք բացահայտում են ստեղծագործ հոգու զարմանահրաշ աշխարհը և վերածում այն երաժշտության: Իսկ երաժշտությունը մի այլ գունապնակ է, որը եթե ուսումնասիրես, ապա ավելի կգունավորվես: Աշխարհները շատ են, փոքրիկ, բայց դրանք բացահայտողները քիչ: Միշտ հիշիր, չկան մոխրագույն ուղեղներ: Դրանք երբեք էլ չեն եղել: Դու ինքդ քո մոլորակի

գույներ ստեղծողն էս: Որքան շատ
բան իմանաս ու բացահայտես,
այնքան ավելի գունավոր կլինես: Մի
վախեցիր դժվարություններից, որով-
հետև դրանք փոքրիկներին ավելի
ուժեղ են դարձնում: Չվախենաս երա-
զել, որովհետև երազանքները մեզ
տանում են հեռուներ և օգնում ստեղծել
աներևակայելին: Եվ վերջում չթողնես
ոչ ոքի սահմանափակել քեզ: Հիշիր, որ
ուղեղը սահմաններ չունի, իսկ գունա-
վոր ուղեղիկն առավել ևս:

Երբ ուղեղիկը դուրս եկավ ուռենու
ճյուղերի տակից՝ նա փայլատակում էր:


Նա գունավորվել էր և նրա գունավոր փոքրիկ պուտիկները վերածվել էին հսկայական գույների շքերթի: Կարմիր, կապույտ, դեղին, մանուշակագույն, զմրուխտե և շատ ավելի շատ գույներ, որոնք դեռ ոչ մեկ չի բացահայտել ու գտել: Ոգևորված նա արագ վազեց դեպի տուն: Նա վազում էր ու չէր հավատում, որ իր մոտ ստացվեց: Ուղեղստանի բնակիչներն արդեն արթնացել էին և անցել իրենց առօրյա, սովորական գործերին: Հանկարծ քաղաքի ծայրամասում ծիածանագույն լույս նկատեցին: Այն այնքան փայլուն էր, որ կուրացնում էր

քաղաքի բնակիչներին, այնքան լուսավոր, որ անհնար էր նայել: Սկզբում չհասկացան, թե դա ինչ է: Բայց շուտով տեսան փոքրիկ ուղեղիկին, որը դեպի քաղաքի հրապարակ էր վազում: Նա այնքան գունավոր էր ու գեղեցիկ, որ նրա գունավոր լույսիկից Ուղեստանի բնակիչների սովորական սրտիկներից սկսեց ծիածանագույն լույս ճառագել: Ուղեղիկը կանգնեց հրապարակի կենտրոնում և բացականչեց.

- Իմ սիրելի քաղաքի բնակիչներ:
Գունավոր ուղեղիկը հեքիաթ չէ. այն

իրականություն է: Գունավոր են այն
ուղեղները, որոնք չեն սահմանա-
փակում իրենց երազելու, սովորելու,
նորը բացահայտելու, կյանքը սիրելու և
ստեղծագործելու կարողությունը:

Երկնքից երեք խնձոր ընկավ:
Մեկը՝ ուղեղիկին, մեկը՝ պատմողին,
մեկն էլ էս հեքիաթը գրողին:



Գունավոր ուղեղիկի առեղծվածը/
Աբազարյան Ս.- Եր.: Հեղ.հրատ., 2025.-
20 էջ: ISBN 978-9939-0-5083-6